

Ո Ր Ո Շ ՈՒ Մ N 019/1
/մաքսային կանոնների խախտման վերաբերյալ
գործի վարույթը կարճելու մասին/

«16» հունվարի 2019թ.

ք. Երևան

Հայաստանի Հանրապետության պետական եկամուտների կոմիտեի Արարատյան մաքսատուն-վարչության պետի տեղակալ Հայկ Հարությունյանս, քննելով Ջազա Աբրամաշվիլի (անձնագիր՝ 17AB73628, հասցե՝ Վրաստանի Հանրապետություն, Խաշուրիի շրջան, գ. Քվիշխեթի) կողմից մաքսային կանոնների խախտման վերաբերյալ գործը.

Պ Ա Ր Զ Ե Ց Ի

Արարատյան մաքսատուն վարչության բացթողնման բաժնի կողմից 26.12.2018 թվականին կազմված թիվ 119 մաքսային գնման (տեսազննման) ակտի համաձայն արձանագրվել է, որ 26.12.2018 թվականին բեռներ տեղափոխող «DAF» մակնիշի թիվ UU354UV/RT751T պետհամարանիշի մեքենայով տեղափոխվող բեռի համար Բավրայի մաքսային կետ-բաժնում լրացվել են չորս տարանցման հայտարարագրեր: Նույն օրը ժամը 15:15-ի սահմաններում «Հայկ» մաքսային պահեստում նախնական զննման և բեռնաթափման է ենթարկվել բեռները, որի արդյունքում պարզվել է, որ Ա/Ձ Տիգրան Կարապետյանին հասցեագրված 700 կգ բեռը չի ժամանել:

Ջազա Աբրամաշվիլին 27.12.2018 թվականին բացատրություն է տվել՝ մասնավորապես հայտնելով, որ 25.12.2018թ. իր վարած ավտոմեքենայով հանդիպել է իր ծանոթ վարորդին, ով խնդրել է իր մեքենայում բարձրված բեռը իր փոխարեն հասցնել Երևան: Հայտնել է նաև, որ իր կցորդը փոխարինել է ծանոթի մեքենայի կցորդով և ուղևորվել Հայաստան, այնուհետև ժամը 01:00-ին հասել է Բավրայի մաքսային կետ-բաժին, իսկ ժամը 04:30-ին մաքսային ծառայողը ձևակերպումներն անելուց հետո փաստաթղթերը հանձնել է իրեն: Հայտնել է նաև, որ ժամը 08:00-ին մուտք է գործել «Հայկ» մաքսային պահեստ, բեռը կշռել է, այնուհետև մշտապես գտնվել է մաքսային պահեստի տարածքում:

Փաստի առթիվ ՀՀ ՊԵԿ Արարատյան մաքսատուն-վարչության բացթողնման թիվ 1 բաժնի գլխավոր մաքսային տեսուչի կողմից 26.12.2018 թվականին Ջազա Աբրամաշվիլի նկատմամբ կազմվել է մաքսային կանոնների խախտման վերաբերյալ արձանագրություն՝ ՀՀ մաքսային օրենսգրքի 203-րդ հոդվածի հատկանիշներով:

ՀՀ ՊԵԿ իրավաբանական վարչության 08.01.2019 թվականի թիվ 11-5/1905612-19 գրությամբ Ա/Ձ Տիգրան Կարապետյանի վերաբերյալ նախապատրաստված նյութերը վերադարձվել են Արարատյան մաքսատուն-վարչությանը՝ օրենքով սահմանված կարգով հետագա ընթացքն ապահովելու համար:

Ներկայացված նյութերի ուսումնասիրության արդյունքում պարզվել է, որ Ա/Ձ Տիգրան Կարապետյանի անունով թիվ 05100022/261218/0032226 տարանցման հայտարարագրով ձևակերպված 700 կգ բեռը փաստացի չի ներմուծվել ՀՀ տարածք, հետևաբար նաև ենթակա չէր հայտարարագրման:

ՀՀ մաքսային օրենսգրքի 189-րդ հոդվածի 1-ին մասի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության

մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն:

Նույն հոդվածի 2-րդ մասի համաձայն՝ ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 203-րդ հոդվածի 1-ին մասի համաձայն՝ Հայաստանի Հանրապետության մաքսային սահմանով տեղափոխվող ապրանքները և տրանսպորտային միջոցները չհայտարարագրելը կամ ոչ իրենց անվանմամբ հայտարարագրելը կամ հայտարարագրման ժամանակ ոչ ճշգրիտ տեղեկություններ նշելը՝ որի արդյունքում չի առաջանում մաքսային վճարների (բացառությամբ մաքսավճարի) պակաս հաշվարկում կամ չհաշվարկում, ինչպես նաև ոչ սակագնային կարգավորման միջոցների չկիրառում՝ հանցագործության հատկանիշների բացակայության դեպքում՝ առաջացնում է տուգանքի նշանակում՝ 50 հազար դրամի չափով:

ՀՀ մաքսային օրենսգրքի 205-րդ հոդվածի համաձայն՝ մաքսային կանոնների խախտման վերաբերյալ գործերի վարույթը կարգավորվում է սույն գլխով և Վարչական իրավախախտումների վերաբերյալ Հայաստանի Հանրապետության օրենսգրքի սույն գլխին չհակասող մասով:

Վարչական իրավախախտումների վերաբերյալ ՀՀ օրենսգրքի 247-րդ հոդվածի 1-ին պարբերության 1-ին կետի համաձայն՝ վարչական իրավախախտման վերաբերյալ գործի վարույթը չի կարող սկսվել, իսկ սկսվածը ենթակա է կարճման հետևյալ հանգամանքների առկայության դեպքում՝ վարչական իրավախախտման դեպքի կամ կազմի բացակայությունը:

Այսպիսով, հաշվի առնելով, որ Ջազա Աբրամաշվիլի գործողություններում բացակայում է ՀՀ մաքսային օրենսգրքի 203-րդ հոդվածի հատկանիշներով նախատեսված իրավախախտման դեպքը և ղեկավարվելով Վարչական իրավախախտումների վերաբերյալ ՀՀ օրենսգրքի օրենսգրքի 247-րդ հոդվածով՝

Ո Ր Ո Շ Ե Ց Ի

1. Ջազա Աբրամաշվիլի նկատմամբ ՀՀ մաքսային օրենսգրքի 203-րդ հոդվածի հատկանիշներով սկսված մաքսային կանոնների խախտման վերաբերյալ գործի վարույթը՝ կարճել:
2. Որոշման մասին օրենքով սահմանված կարգով իրազեկել Ջազա Աբրամաշվիլին:

ԱՐԱՐԱՏՅԱՆ ՄԱՔՍԱՏՈՒՆ-
ՎԱՐՉՈՒԹՅԱՆ ՊԵՏԻ ՏԵՂԱԿԱԼ



ՀԱՐՈՒԹՅՈՒՆՅԱՆ